



Crakeik koe zivotc

**Tana rupa ke
*Stuvatum ke Crakeik tota***

(c) Damien Etcheverry

Xantof krent kan Kotava. Ewaveem daskiyin
gan Copilot TG- talpey.

Xanto : Stuvatum ke *Crakeik* tota ;
Crakeik koe zivotc (2-e otuk, 2026).

Krentara is ponara is piskura skuyuna
gan Damien Etcheverry (2026).

1-e ~ Leve awalt ke Kariba bira

Darekeon. Frolgukafa Kariba bira divlizer, diliodafa is sizuntasa leve faltukaf kelt. Crakeik tcordafa tota va ora ludzer, kan italeem adeesin gan platimisa suka. Gadeson, rontafa is oklafa brucka ke Marjorie Oluikya va kotiura cuynon dizver. Inafa tobakirafa nuba bene niranafa inta ke viaro aykawer, inafa disukera va zida zemar. Birelik moe laloy cobaled, daavon voketeson va batakap ital kabdu idulafa bwafa sukara. Gael tir vumeltaf, vumeltarsaf.



2-e ~ Koe ilpega

Koe nilafa ilpega, gael va idulafa sebeka is abdafa inta divdaaker. Gumka armoron gu tota stibuskar. Marjorie Oluikya is Mulberry ikaredakik van biraliwot stokeyen moe azega xowad.

— Ede va ronef ewaleem kenolapit, pune va trampa tarutetet, ~ inya kalir, conyukason va zalor kan gelt.

— Voxen ede suka arliz stitir, redakik ? ~ Mulberry bulegar, ton lukoptaf lukast bupes.

— Bantode luwitit. Dum kotviele.

Tota tislamar. Odjafa twera koe cewa kamamar, dum teca walzera.



3-e ~ Zida tuorikawer

Suka su niarur. Moe ciska, Marjorie Oluikya is Mulberry va zida zemad. Ebeltaf rujodap gamiaf is dratces zuvdad. Sumuon, orikafa flava va kelt ticnir, fixason va afi. Birelik moe azeba tegulawed.

— Zivotc vannir ! ~ tan birelik ticu istenorisk iegar.

Mulberry vawale talgeem vogadar. Benplekura djobed :

— Va italeem fandizac !! Va wazdel-eem vanlicac !!

Vumeltuca ke Kariba bira dum koe klokeru tekawer. Kelt va int kosidar.



4-e ~ Yatkuca ke ora

Zivotc volsaason baliewer. Runtolk dum rebavega tantanon madawed aze mo azeba ton tuxadasa nokodara seluwed. Muva va kota gexata ustarsar, suka va ewa div art soltiolter.

— Gipic !! ~ Marjorie Oluikya eviegar, ben stirkot inton xodason.

— Va ital !! Mo laloy ticumac !!

Birelik ticumad ise kilded aze gin ranyad. Tota leve tizuca ke zivotccek is reem twer.



5-e ~ Kroge

Grenyafe twepe tauler. Abduenorisk ve zo ariser aze mo azeba ton rujod dem roida ve atitsur. Cug ital dum rantafa eluxa zo sollipad. Tan birelik ko bira zo divkabur, ar zo sagonder nume titker.

— Mulberry, va laloyeem ke abduenorisk volmiv en gabeyal !! Va in ko bira, wluon !! To wuperse tir !

Voxen bira porson loon dam sinafa puda evier. Crakeik tota fu nuxonuker.



6-e ~ Razdane egale

Gazda va divulgaf amlit vanburer.
Vazaf awalt va alkejayana azeba afiar.
To yon empayan azeb, dat rumkawes
wazdel, kot kolpayan ital. Bakanik bred,
Mulberry va cepta gasuped. Marjorie
Oluikya va voy ranyeson nyaser, gexata-
budeson. Tota al remblir.

— Va brava en gotrasit. Kalion, kalia-
pon, ~ prejar.

Mulberry nutir buktafi, nugeber.



7-e ~ Pirdot

Moe tervayana azeba, Marjorie Oluikya is Mulberry is dalaf levfayik sinton kuljed. Gexata cued, puda tid wevdafa.

— Abduenorisk zo empayar, cug ital zo sollipayad. Abicedje remblitit.

Usukiskaf is vobigakiraf dalaf levfayik buzegar :

— Arti totasa tolka, lana ceda tir. Dem onasikafa wida.

Marjorie Oluikya takenkalir.

— Numen, van bata ceda lapit !! Ban-lize dimempatat.

Gorara zo narar : remblira tice kot-coba.



8-e ~ Uzera

Tota koe diliodafa bwafa cedama inton ekastar, i koe ceda riwe megel-trafa radimi zivotccek. Witka va wawafa patectolafa wida vankilder. Marjorie Oluikya ranyesa moe tototsa va bemuaf koriktumam kiavar. Sugdon gu dili nubamadar. Koldam kum inta titeon tigr. Mulberry luxeon ranyesi moe totekwa guvolokawer. Balemoy birelik amlitason detced. Konak guyaf widik moe seitaf vadjuk ked. Widokilik, i ayikye dise va tcalayan kolmeem, va vanlapis totuk xeyon dizver.



9-e ~ Diliuk

Vadjuk leve sinyona bora twer.
Mulberry abduhanir, gison va fenkuyun
koldam kotraf gu moavaf erbolc, van
widiktum is okilik.

— Ika winafa pomara, ~ skulbon
kalir.

Okilik klabumur aze konaler. Marjo-
rie Oluikya takablagar.

— Ton volnik me artlapiv. Va intafa
tota anton djukudimempav.

— Battode tic drumbik, va win
pomatav, ~ okilik dulzer.

Spua tekawer. Diliuk su zo webokar,
nope tena ke tarkara is adruca.



10-e ~ Dimempara

Leve awalt, birelik is widik va fliotafa dimempara va tota belcon kobaved. Bakanik va xeka gin narid, lantanye dem intanimat va azeb solgabeyar. Ital zo gamped, warzaf greles abduenorisk zo ksear. Paluca bak myelgara toz awir. Marjorie Oluikya is widokilik va nakila is kobas ayik moe piluda is kene vadjuk eninted.

— Rinaf drig tir takrelaf, ~ okilik kalir.

— Rinafa wida tir disafa, ~ ina disuker.



11-e ~ **Voxazen...**

Ba siel, Marjorie Oluikya moe piluda ton stazeem koe bixe ant debanyer. Tota flioton su zo dimempar ise abdi eldefa dimlapira kene vadjuk re viklamar. Wida kadimeon zijnon gaeler. Suka va dakela ke eip is gondana inta dear.

Ina repaler, legafa vox grizidesa.

— Bira someixer... voxes va toleafa katecta sofirvir.

Inafa disukera ko runta eglur. Stuva me tir artifa, anton zo ilvielar.

